

LA USC DI LADINS – VENERDÌ 8 NOVEMBRE 2013

La leteratura ladina

N merdi iel la prejentazion dl liber „Storia dla leteratura ladina - Geschichte der ladinischen Literatur“ de Rut Bernardi y Paul Videsott

Leteratura - L liber vën prejentà n merdi ai 12 de nuvèmber dala 20.00 a Urtijëi tla biblioteca dla Lia Mostra d'Ert. I autores dl liber nuef dla Storia dla leteratura ladina nvieia de cuer ala prejentazion.

Sun 1.502 plates vëniel prejentà bën 245 autores ladins dla cin' valedes ladines dla Dolomites. Almanco dal ann 1631 incà vëniel scrit per ladin, ma scric che n possa tlamé leteratura - for tl cheder de na leteratura regionela - ons dal 1800 inant.

I prim scric àn giatà ti archifs dla colonies y te biblioteches, nce privates. Nscila iel nce unì a lum descuvierdes de marueia che unirà prejentedes per l prim iede a n publich plu lerch.

L duvier de na tel storia dla leteratura regionela ie danter l auter nce de purté a lum autores desmincei, de cri tesé letereres te media desferënc - ncuei nce ti media audio-visuei, de tò n cunscidrazion nce tesé nia mé blót letereres, chël uel di de slargë ora la definizion de leteratura y de tò ju la irarchies.

Chësta finalità ie per la gran pert unida arjonta y i autores Rut Bernardi y Paul Videsott se ncunforta a pudëi prejenté i



L liber Storia dla leteratura ladina.

resultac ala jënt ladina ntëur Mëisules y sëurora. Tulëve dl'aurela, che l se paia! (up)